

- 1' Der hütt der hewschreck an der sunn
- 2' Vnd schüttet wasser jn eyn brunn
- 3' Wer hüttet das syn frow blib frumm



## Von frowen huetten

- 1 Vil narren tag / vnd selten güt
- 2 Hat / wer synr frowen hütten düt
- 3 Dann welch wol will / die düt selb recht
- 4 Welch übel will / die macht bald schlecht

5 Wie sie zů wegen bring all tag  
 6 Jr böß fürnemen vnd anschlag  
 7 Leitt man eyn malschloß schon dar für  
 8 Vnnd bslüßt all rigel / tor / vnd tür /  
 9 Vnd setz jns huß der hūter vil  
 10 So gatt es dennaht als es wil  
 11 Was halff der thurn dar jnn Danā ging  
 12 Dar für / do sie eyn kynd entpfyng /  
 13 Penolope was fry vnd loß  
 14 Vnnd hatt vmb sich vil büler groß  
 15 Vnd was jr man zweintzig jor vß  
 16 Bleib sie doch frumm / jn irem huß  
 17 Der spräch alleyn / das er noch sy /  
 18 Vor btrügñiß syner frowen fry  
 19 Der hab syn frow ouch lieb vnd holt  
 20 Den syn frow nie betriegen wolt  
 21 Eyn hübsch frow die eyn nārrin ist  
 22 Jst glich eym roß dem oren gbryst  
 23 Wer mit der selben eren will  
 24 Der machet krummer fürchen vil  
 25 Eyn fromme frow soll haben gbārd  
 26 Jr ougen schlagen zů der erd  
 27 Vnd nit hoffwort mit yederman  
 28 Tryben / vnd yeden gāfflen an  
 29 Noch hören alles das man jr seitt /  
 30 Vil kuppler gont jn schoffes kleydt  
 31 Hett nit Helen vff Pariß gyfft  
 32 Eyn antwürt geben jn geschrift  
 33 Vnd Dydo durch jr schwester Ann  
 34 Sie werent beid on frömde mann